

ओं नमः परमात्मने, श्री महागणपतये नमः,

श्री गुरुभ्यो नमः

हरिः ओं ॥

कृष्ण यजुर्वेदीय तैत्तिरीय संहिता

पद पाठः (वाक्य सहित)

प्रथमकाण्डे द्वितीयः प्रश्नः

Version Notes:

This is now the current Version 1.1 dated August 31, 2022.

1. This replaces the earlier version 1.0 dated Oct 31, 2021.
2. No corrections found and reported till August 15, 2022 from the date of previous version 1.0 dt 31st Oct 2021.
3. In this version we have newly added a summary of various padams at the end part of this book.
4. Required convention, style and presentation improvements or standardisations has been done wherever applicable.
5. Notify your corrections / suggestions etc to our email id vedavms@gmail.com

Earlier Versions

1st	Version Number	0.0	dated 30th April 2019
2nd	Version Number	0.1	dated 30th June 2020
3rd	Version Number	0.2	dated 31st Aug 2020
4th	Version Number	1.0	dated 30th June 2021
5th	Version Number	1.0	dated 31st Oct 2021

Table of Contents

1 कृष्ण यजुर्वेदीय तैत्तिरीय संहिता पद पाठे प्रथमं काण्डं 5

1.2 प्रथमकाण्डे द्वितीयः प्रश्नः (अग्निष्टोमे क्रयः)..... 5

ओं नमः परमात्मने, श्री महागणपतये नमः,

श्री गुरुभ्यो नमः ॥ हरिः ओं

1 कृष्ण यजुर्वेदीय तैत्तिरीय संहिता पद पाठे प्रथमं

काण्डं

1.2 प्रथमकाण्डे द्वितीयः प्रश्नः (अग्निष्टोमे क्रयः)

TS 1.2.1.1

आप॑ उ॒न्दन्तु॑ जी॒वसे॑ दी॒र्घायु॑त्वाय॒ वर्च॑स ओष॑धे त्राय॑स्वैन॒ स्वधि॑ते
मै॒न॒ हि॒सी॑ दे॒वश्रू॑रेतानि॒ प्र व॑पे स्व॒स्त्युत्त॑राण्यशीयाऽऽपो॑
अ॒स्मान् मा॒तरः॑ शु॒न्धन्तु॑ घृ॒तेन॑ नो घृ॒तपु॑वः पु॒नन्तु॑ विश्व॑म॒स्मत्
प्र व॑हन्तु रि॒प्रमु॑दा॒भ्यः शु॒चिरा॑ पू॒त ए॒मि सो॑मस्य॒ तनू॑रसि॒ तनु॑वं
मे पा॑हि मही॒नां पयो॑ ऽसि॒ वर्चो॑धा॒ असि॑ वर्चो॒ – [] 1

TS 1.2.1.1

आपः॑ । उ॒न्दन्तु॑ । जी॒वसे॑ । दी॒र्घायु॑त्वायेति॑ दी॒र्घायु॑ – त्वाय॑ । वर्च॑से ।
ओष॑धे । त्राय॑स्व । ए॒नम् । स्व॒धित॑ इति॒ स्व-धि॑ते । मा । ए॒नम् ।
हि॒सीः॑ । दे॒वश्रू॑रिति॒ देव॑ – श्रूः । ए॒तानि॑ । प्रेति॑ । व॒पे । स्व॒स्ति ।

उत्तराणीत्युत् – तराणि । अशीय । आपः । अस्मान् । मातरः ।
 शुन्धन्तु । घृतेन । नः । घृतपुव इति घृत-पुवः । पुनन्तु । विश्वम् ।
 अस्मत् । प्रेति । वहन्तु । रिप्रम् । उदिति । आभ्यः । शुचिः । एति ।
 पूतः । एमि । सोमस्य । तनूः । असि । तनुवम् । मे । पाहि ।
 महीनाम् । पयः । असि । वर्चोधा इति वर्चः – धाः ।
 असि । वर्चः । 1 (50)

TS 1.2.1.2

मयि धेहि वृत्रस्य कनीनिका ऽसि चक्षुष्पा असि चक्षुर्मे पाहि
 चित्पतिस्त्वा पुनातु वाक्पतिस्त्वा पुनातु देवस्त्वा सविता
 पुनात्वच्छिद्रेण पवित्रेण वसोः सूर्यस्य रश्मिभिस्तस्य ते पवित्रपते
 पवित्रेण यस्मै कं पुने तच्छकेयमा वो देवास ईमहे सत्यधर्माणो
 अद्ध्वरे यद्-वो देवास आगुरे यज्ञियासो हवामह इन्द्राग्नी
 द्यावापृथिवी आप ओषधी () स्त्वं दीक्षाणा-मधिपतिरसीह
 मा सन्तं पाहि ॥ 2

TS 1.2.1.2

मयि॑ । धे॒हि॑ । वृ॒त्रस्य॑ । क॒नी॒निका॑ । अ॒सि॑ । च॒क्षु॒ष्पा इति॑ चक्षुः-पाः ।
 अ॒सि॑ । च॒क्षुः॑ । मे॒ । पा॒हि॑ । चि॒त्पति॑रिति चित् - पतिः॑ । त्वा॒ ।
 पु॒नातु॑ । वा॒क्पति॑रिति वाक् - पतिः॑ । त्वा॒ । पु॒नातु॑ । दे॒वः॑ । त्वा॒ ।
 स॒विता॑ । पु॒नातु॑ । अ॒च्छि॒द्रेण॑ । प॒वित्रे॑ण । व॒सोः॑ । सूर्य॑स्य ।
 र॒श्मिभि॑रिति र॒श्मि - भिः॑ । तस्य॑ । ते॒ । प॒वित्र॑पत इति पवित्र-पते॑ ।
 प॒वित्रे॑ण । यस्मै॑ ॥ कम् । पु॒ने॑ । तत् । श॒के॒यम् । एति॑ । वः॒ । दे॒वासः॑ ।
 ई॒महे॑ । स॒त्यध॑र्माण इति सत्य - धर्माणः॑ । अ॒ध्वरे॑ । यत् । वः॒ ।
 दे॒वासः॑ । आ॒गुर इत्या॑ - गु॒रे॑ । य॒ज्ञिया॑सः । ह॒वामहे॑ । इन्द्रा॑ग्नी
 इतीन्द्र॑ - अ॒ग्नी॑ । द्या॒वापृ॑थिवी इति द्या॒वा - पृ॑थिवी । आपः॑ ।
 ओष॑धीः() । त्वम् । दी॒क्षाणा॑म् । अधि॑पतिरित्यधि - पतिः॑ । अ॒सि॑ ।
 इ॒ह । मा॒ । स॒न्तम्॑ ॥ पा॒हि॑ ॥ 2 (58) (वर्च॑ - ओष॑धीरष्टौ च) (A1)

TS 1.2.2.1

आ॒कू॒त्यै प्र॒युजे॑ऽग्नये॒ स्वाहा॑ मे॒धायै॑ मन॒से ऽग्नये॒ स्वाहा॑ दी॒क्षायै॑
 तप॑से॒ ऽग्नये॒ स्वाहा॑ सर॒स्वत्यै॑ पू॒ष्णे॑ ऽग्नये॒ स्वाहा॑ ऽऽपो॑ दे॒वीर्बृ॑हती
 वि॒श्वशं॑भुवो॒ द्या॒वापृ॑थिवी॒ उर्व॑न्तरि॒क्षं बृ॑ह॒स्पति॑र्नो॒ ह॒विषा॑ वृ॒धातु॑

स्वाहा विश्वे देवस्य नेतुर्मर्तो वृणीत सख्यं विश्वे राय इषुद्ध्यसि
 द्युम्नं वृणीत पुष्यसे स्वाहर्ख्सामयोः शिल्पे स्थ स्ते वामा
 रभे ते मा - [] 3

TS 1.2.2.1

आकूत्या इत्या - कूत्यै । प्रयुज इति प्र - युजे । अग्नये । स्वाहा ।
 मेधायै । मनसे । अग्नये । स्वाहा । दीक्षायै । तपसे । अग्नये ।
 स्वाहा । सरस्वत्यै । पूष्णे । अग्नये । स्वाहा । आपः । देवीः ।
 बृहतीः । विश्वशंभुव इति विश्व - शंभुवः । द्यावापृथिवी इति
 द्यावा - पृथिवी । उरु । अन्तरिक्षम् । बृहस्पतिः । नः । हविषा ।
 वृधातु । स्वाहा । विश्वे । देवस्य । नेतुः । मर्तः । वृणीत । सख्यम् ।
 विश्वे । रायः । इषुद्ध्यसि । द्युम्नम् । वृणीत । पुष्यसे । स्वाहा ।
 ऋख्सामयोरित्यृक् -सामयोः । शिल्पे इति । स्थः । ते इति । वाम् ।
 एति । रभे । ते इति । मा । 3 (50)

TS 1.2.2.2

पातमास्य यज्ञस्योदृच इमां धियं शिक्षमाणस्य देव क्रतुं
 दक्षं वरुण सञ्शिशधि यया ऽति विश्वा दुरिता तरेम सुतर्माणमधि

नाव॑ रु॒हे॒मो॒र्ग॒स्याङ्गि॒र॒स्यूर्ण॑म्र॒दा ऊ॒र्जं॑ मे॒ यच्छ॑ पा॒हि मा॒ मा मा॑
 हि॑सी-वि॒ष्णोः॑ श॒र्मा॒सि श॒र्म य॑ज॒मान॒स्य श॒र्म मे॒ यच्छ॑
 नक्ष॑त्राणां॒ मा ऽती॑काशात् पा॒हीन्द्र॑स्य॒ योनि॑रसि - [] 4

TS 1.2.2.2

पा॒तम् । ए॒ति । अ॒स्य । य॒ज्ञस्य॑ । उ॒दृ॒च इ॒त्युत् - ऋ॒चः । इ॒माम् ।
 धि॒यम् ॥ शि॒क्ष॒मा॒णस्य॑ । दे॒व । क्र॒तुम् ॥ दक्ष॑म् । व॒रु॒ण । स॒मि॒ति ।
 शि॒शा॒धि ॥ यया॑ । अ॒ती॒ति । वि॒श्वा ॥ दु॒रि॒ते॒ति दुः - इ॒ता । तरे॑म ।
 सु॒त॒र्मा॒णमि॒ति सु -त॑र्माणम् । अधी॑ति । ना॒वम् । रु॒हे॒म । ऊ॒र्क् ।
 अ॒सि । आ॒ङ्गि॒र॒सी । ऊ॒र्ण॑म्र॒दा इ॒त्यूर्ण॑ - म्र॒दाः । ऊ॒र्ज॑म् । मे ।
 य॒च्छ । पा॒हि । मा॒ । मा॒ । मा॒ । हि॑सीः । वि॒ष्णोः॑ । श॒र्म । अ॒सि ।
 श॒र्म । य॑ज॒मान॒स्य । श॒र्म । मे॒ । य॒च्छ । नक्ष॑त्राणाम् । मा॒ ।
 अ॒ती॒का॒शात् । पा॒हि । इन्द्र॑स्य । यो॒निः । अ॒सि । 4 (50)

TS 1.2.2.3

मा॒ मा॒ हि॑सीः कृ॒ष्यै॑ त्वा॒ सु॒स॒स्यायै॑ सु॒पि॒प्प॒ला॒भ्य-स्त्वौष॑धीभ्यः
 सू॒प॒स्था॑ दे॒वो व॒न॒स्पति॑रु॒र्द्ध्वो॑ मा॒ पा॒ह्यो॒दृ॒चः॑ स्वा॒हा य॒ज्ञं म॑नसा

स्वाहा द्यावापृथिवीभ्या७ स्वाहोरो-रन्तरिक्षात् स्वाहा यज्ञं
वातादा रभे ॥ 5

TS 1.2.2.3

मा । मा । हि७सीः । कृष्यै । त्वा । सुसस्याया इति सु – सस्यायै ॥
सुपिप्पलाभ्य इति सु – पिप्पलाभ्यः । त्वा । ओषधीभ्य
इत्योषधि – भ्यः । सूपस्था इति सु – उपस्थाः । देवः । वनस्पतिः ।
ऊर्ध्वः । मा । पाहि । एति । उदृच इत्युत् – ऋचः । स्वाहा ॥
यज्ञम् । मनसा । स्वाहा ॥ द्यावापृथिवीभ्यामिति द्यावा-पृथिवीभ्याम् ।
स्वाहा ॥ उरोः । अन्तरिक्षात् । स्वाहा ॥ यज्ञम् । वातात् । एति ।

रभे ॥ 5 (30) (मा – योनिरसि – त्रि७शच्च) (A2)

TS 1.2.3.1

दैवीं धियं मनामहे सुमृडीका-मभिष्टये वर्चोधां यज्ञवाहस७ सुपारा
नो असद् वशै ।

ये देवा मनोजाता मनोयुजः सुदक्षा दक्षपितारस्ते नः पान्तु ते
नो ऽवन्तु तेभ्यो नमस्तेभ्यः स्वाहा ऽग्ने त्व७ सु जागृहि वय७
सु मन्दिषीमहि गोपाय नः स्वस्तये प्रबुधे नः पुनर्ददः ।

त्वमग्ने व्रतपा असि देव आ मर्त्येष्वाम् ।

त्वं – [] 6

TS 1.2.3.1

दैवीम् । धियम् । मनामहे । सुमृडीकामिति सु – मृडीकाम् ।
 अभिष्टये । वर्चोधामिति वर्चः – धाम् । यज्ञवाहसमिति
 यज्ञ – वाहसम् । सुपारेति सु – पारा । नः । असत् । वशे ॥ ये ।
 देवाः । मनोजाता इति मनः – जाताः । मनोयुज इति मनः – युजः ।
 सुदक्षा इति सु – दक्षाः । दक्षपितार इति दक्ष – पितारः । ते । नः ।
 पान्तु । ते । नः । अवन्तु । तेभ्यः । नमः । तेभ्यः । स्वाहा ॥ अग्ने ।
 त्वम् । स्विति । जागृहि । वयम् । स्विति । मन्दिषीमहि । गोपाय ।
 नः । स्वस्तये ॥ प्रबुध इति प्र – बुधे ॥ नः । पुनः । ददः ॥ त्वम् ।
 अग्ने । व्रतपा इति व्रत – पाः । असि । देवः । एति । मर्त्येषु ।
 आ ॥ त्वम् । 6 (50)

TS 1.2.3.2

य॒ज्ञेष्वी॒ड्यः॑ ॥

वि॒श्वे॑ दे॒वा अ॒भि मा॒मा ऽव॑वृ॒त्रन् पू॒षा स॒न्या सो॒मो रा॒धसा॑ दे॒वः
 स॒वि॒ता वसो॑र्वसु॒दावा॑ रा॒स्वेय॑त् सो॒मा ऽऽभू॑यो॒ भर॒ मा पृ॑णन् पू॒र्त्या
 वि रा॒धि मा ऽह॑मायु॒षा च॒न्द्रम॑सि॒ मम॒ भो॒गाय॑ भव॒ वस्त्र॑मसि॒
 मम॒ भो॒गाय॑ भवो॒स्रा ऽसि॒ मम॒ भो॒गाय॑ भव॒ हयो॑ ऽसि॒ मम॒
 भो॒गाय॑ भव॒-[] 7

TS 1.2.3.2

य॒ज्ञेषु॑ । ई॒ड्यः॑ ॥ वि॒श्वे॑ । दे॒वाः । अ॒भीति॑ । मा॒म् । ए॒ति । अ॒व॒वृ॒त्रन् ।
 पू॒षा । स॒न्या । सो॒मः । रा॒धसा॑ । दे॒वः । स॒वि॒ता । वसो॑ः ।
 वसु॑दावेति वसु – दावा॑ । रा॒स्व । इ॒यत् । सो॒म । ए॒ति । भू॒यः ।
 भर॑ । मा । पृ॒णन् । पू॒र्त्या । वी॒ति । रा॒धि । मा । अ॒हम् । आ॒युषा॑ ।
 च॒न्द्रम् । अ॒सि । मम॑ । भो॒गाय॑ । भव॑ । वस्त्र॑म् । अ॒सि । मम॑ ।
 भो॒गाय॑ । भव॑ । उ॒स्रा । अ॒सि । मम॑ । भो॒गाय॑ । भव॑ । ह॒यः ।
 अ॒सि । मम॑ । भो॒गाय॑ । भव॑ । 7 (50)

TS 1.2.3.3

छागो॑ ऽसि॒ मम॒ भोगाय॑ भव॒ मेषो॑ ऽसि॒ मम॒ भोगाय॑ भव॒ वायवे॑॑ त्वा
वरुणाय॑ त्वा॒ निर्ऋत्यै॑ त्वा॒ रुद्राय॑ त्वा॒ देवीरापो॑ अपां॒ नपाद्-य
ऊर्मिर्ः॑ ह॒विष्य॑ इन्द्रियावान्-मदि॒न्तमस्तं॑ वो॒ मा ऽव॑ क्रमिषमच्छिन्नं॑
तन्तुं॑ पृथिव्या॑ अनु॒ गेषं॑ भद्रादभि॒ श्रेयः॑ प्रेहि॒ बृहस्पतिः॑ पुरएता
ते अस्त्वथे॑मव॒ स्य () वर॑ आ पृथिव्या॑ आरे॒ शत्रून् कृणुहि॑ सर्ववीर
एदमगन्म॑ देवयजनं॑ पृथिव्या॑ विश्वे॑ देवा॒ यदजुषन्त॑ पूर्व
ऋख्स्सामाभ्यां॑ यजुषा॑ सन्तरन्तो॑ रायस्पोषेण॑ समिषा॑ मदेम ॥ 8

TS 1.2.3.3

छागः॑ । असि॒ । मम॒ । भोगाय॑ । भव॒ । मेषः॑ । असि॒ । मम॒ । भोगाय॑ ।
भव॒ । वायवे॑॑ । त्वा॒ । वरुणाय॑ । त्वा॒ । निर्ऋत्या॑ इति॒ निः- ऋत्यै॑ ।
त्वा॒ । रुद्राय॑ । त्वा॒ । देवीः॑ । आपः॑ । अपाम् । नपात् । यः । ऊर्मिः ।
हविष्यः॑ । इन्द्रियावानितीन्द्रिय॑ - वान् । मदि॒न्तमः॑ । तम् । वः । मा ।
अवेति॑ । क्रमिषम् । अच्छिन्नम् । तन्तुम् । पृथिव्याः॑ । अन्विति॑ ।
गेषम् । भद्रात् । अभीति॑ । श्रेयः॑ । प्रेति॑ । इहि॑ । बृहस्पतिः॑ ।
पुरएतेति॑ पुरः - एता । ते । अस्तु॑ । अथ । ईम् । अवेति॑ ।

स्य () । वरे । एति । पृथिव्याः । आरे । शत्रून् । कृणुहि ।
 सर्ववीर इति सर्व – वीरः । एति । इदम् । अगन्म । देवयजनमिति
 देव – यजनम् । पृथिव्याः । विश्वे । देवाः । यत् । अजुषन्त । पूर्वे ।
 ऋक्सामाभ्यामित्यृक्साम – भ्याम् । यजुषा । सन्तरन्त इति
 सं – तरन्तः । रायः । पोषेण । समिति । इषा । मदेम ॥ 8 (75)

(आ त्वञ्-हयोऽसि मम भोगाय भव-स्य-पञ्चविंशतिश्च) (A3)

TS 1.2.4.1

इयं ते शुक्र तनूरिदं वर्चस्तया सं भव भ्राजं गच्छ जूरसि धृता
 मनसा जुष्टा विष्णावे तस्यास्ते सत्यसवसः प्रसवे वाचो यन्त्रमशीय
 स्वाहा शुक्रमस्यमृतमसि वैश्वदेवञ् हविः सूर्यस्य
 चक्षुरा ऽरुहमग्ने-रक्षणः कनीनिकां यदेत शोभिरीयसे भ्राजमानो
 विपश्चिता चिदसि मना ऽसि धीरसि दक्षिणा – [] 9

TS 1.2.4.1

इयम् । ते । शुक्र । तनूः । इदम् । वर्चः । तया । समिति । भव ।
 भ्राजम् । गच्छ । जूः । असि । धृता । मनसा । जुष्टा । विष्णावे ।

तस्याः । ते । सत्यसवस इति सत्य – सवसः । प्रसव इति
 प्र – सवे । वाचः । यन्त्रम् । अशीय । स्वाहा ॥ शुक्रम् । असि ।
 अमृतम् । असि । वैश्वदेवमिति वैश्व – देवम् । हविः । सूर्यस्य ।
 चक्षुः । एति । अरुहम् । अग्नेः । अक्ष्णः । कनीनिकाम् । यत् ।
 एतशेभिः । ईयसे । भ्राजमानः । विपश्चिता ॥ चित् । असि । मना ।
 असि । धीः । असि । दक्षिणा । 9 (50)

TS 1.2.4.2

ऽसि यज्ञिया ऽसि क्षत्रिया ऽस्यदिति-रस्युभयतश्शीर्ष्णी सा नः
 सुप्राची सुप्रतीची सं भव मित्रस्त्वा पदि बद्धनातु पूषा ऽध्वनः
 पात्विन्द्राया-द्ध्यक्षायानु त्वा माता मन्यतामनु पिता ऽनु भ्राता
 सगर्भ्यो ऽनु सखा सयूथ्यः सा देवि देवमच्छेहीन्द्राय सोमं
 रुद्रस्त्वाऽऽ वर्तयतु मित्रस्य पथा स्वस्ति सोम सखा ()
 पुनरेहि सह रय्या ॥ 10

TS 1.2.4.2

असि । यज्ञिया ॥ असि । क्षत्रिया ॥ असि । अदितिः । असि ।
 उभयतश्शीर्ष्णीत्युभयतः-शीर्ष्णी । सा । नः । सुप्राचीति सु-प्राची ।

सुप्रतीचीति सु – प्रतीची । समिति । भव । मित्रः ।
 त्वा । पदि । बद्धनातु । पूषा । अद्ध्वनः । पातु । इन्द्राय ।
 अद्ध्यक्षायेत्यधि – अक्षाय । अन्विति । त्वा । माता । मन्यताम् ।
 अन्विति । पिता । अन्विति । भ्राता ॥ सगर्भ्य इति स – गर्भ्यः ।
 अन्विति । सखा ॥ सयूथ्य इति स – यूथ्यः । सा । देवि । देवम् ।
 अच्छ । इहि । इन्द्राय । सोमम् ॥ रुद्रः । त्वा । एति । वर्तयतु ।
 मित्रस्य । पथा । स्वस्ति । सोमसखेति सोम – सखा () । पुनः ।
 एति । इहि । सह । रय्या ॥ 10 (55)

(दक्षिणा-सोमसखा-पञ्च च) (A4)

TS 1.2.5.1

वस्व्यसि रुद्रा ऽस्यदिति-रस्यादित्या ऽसि शुक्रा ऽसि चन्द्रा ऽसि
 बृहस्पतिस्त्वा सुम्ने रण्वतु रुद्रो वसुभिरा चिकेतु पृथिव्यास्त्वा
 मूर्द्धन्ना जिघर्मि देवयजन इडायाः पदे घृतवति स्वाहा परिलिखितं
 रक्षः परिलिखिता अरातय इदमहं रक्षसो ग्रीवा अपि कृन्तामि
 यो ऽस्मान् द्वेष्टि यं च वयं द्विष्म इदमस्य ग्रीवा – [] 11

TS 1.2.5.1

व॒स्वी॑ । अ॒सि॒ । रु॒द्रा॑ । अ॒सि॒ । अ॒दि॒तिः॑ । अ॒सि॒ । आ॒दि॒त्या॑ । अ॒सि॒ ।
शु॒क्रा॑ । अ॒सि॒ । च॒न्द्रा॑ । अ॒सि॒ । बृ॒ह॒स्प॒तिः॑ । त्वा॒ । सु॒म्ने॑ । र॒ण्व॒तु॑ ।
रु॒द्रः॑ । व॒सु॒भि॒रि॒ति॒ व॒सु॑ – भिः॒ । ए॒ति॑ । चि॒के॒तु॑ । पृ॒थि॒व्याः॑ । त्वा॒ ।
मूर्द्ध॒न् । ए॒ति॑ । जि॒घ॒र्मि॑ । दे॒व॒य॒ज॒न॒ इति॑ दे॒व – य॒ज॒ने॑ । इ॒डा॒याः॑ ।
प॒दे॑ । घृ॒त॒व॒ती॒ति॑ घृ॒त – व॒ति॑ । स्वा॒हा॑ । परि॒लि॒खि॒त॒मि॒ति॑
परि॑ – लि॒खि॒त॒म् । र॒क्षः॑ । परि॒लि॒खि॒ता॒ इति॑ परि॑ – लि॒खि॒ताः॑ ।
अ॒रा॒त॒यः॑ । इ॒द॒म् । अ॒ह॒म् । र॒क्ष॒सः॑ । ग्री॒वाः॑ । अ॒पी॒ति॑ । कृ॒न्ता॒मि॑ ।
यः॑ । अ॒स्मान् । द्वेष्टि॑ । यम् । च॒ । व॒य॒म् । द्वि॒ष्मः॑ । इ॒द॒म् । अ॒स्य॑ ।

ग्री॒वाः॑ । 11 (50)

TS 1.2.5.2

अ॒पि॑ कृ॒न्ता॒म्य॒स्मे॒ रा॒य॒स्त्वे॑ रा॒य॒स्तो॒ते॒ रा॒यः॑ सं॒ दे॒वि॑ दे॒व्यो॒र्व॒श्या॑
प॒श्य॒स्व॒ त्व॒ष्टी॑म॒ती॒ ते॒ स॒पे॒य॒ सु॒रे॒ता॒ रे॒तो॒ द॒धा॒ना॑ वी॒रं॑ वि॒दे॒य॒ तव॑
स॒न्दृ॒शि॒मा॒ ऽह॑ꣳ रा॒य॒स्यो॒र्षे॒ण॑ वि॒ यो॒षं॑ ॥ 12

TS 1.2.5.2

अपी॑ति । कृ॒न्ता॒मि॒ । अ॒स्मे इति॑ । रा॒यः॑ । त्वे॑ इति॑ । रा॒यः॑ । तो॒ते॑ ॥
 रा॒यः॑ । समि॑ति । दे॒वि॒ । दे॒व्या॑ । उ॒र्व॒श्या॑ ॥ प॒श्य॒स्व॒ । त्व॒ष्टी॑मती । ते॒ ।
 स॒पे॒य॒ । सु॒रेता॑ इति॑ सु – रेताः॑ ॥ रे॒तः॑ । द॒धाना॑ । वी॒रम्॑ । वि॒दे॒य॒ ।
 तव॑ । स॒न्दृ॒शीति॑ सं – दृ॒शि॑ । मा॒ । अ॒हम्॑ । रा॒यः॑ । पो॒षेण॑ ।
 वी॒ति॑ । यो॒षम्॑ ॥ 12 (29)

(अ॒स्य॑ ग्री॒वा-ए॒कान्न॑ त्रि॒श॒च्च॑) (A5)

TS 1.2.6.1

अ॒शु॒ना॑ ते अ॒शुः॑ पृ॒च्यतां॑ प॒रुषा॑ प॒रुर्ग॒न्धस्ते॑ का॒मम॑वतु॒ मदा॑य
 र॒सो अ॒च्यु॑तो ऽमा॒त्यो ऽसि॑ शु॒क्रस्ते॑ ग॒हो ऽभि॑ त्यं दे॒व॒
 स॒वि॒ता॒र॒मू॒ण्योः॑ क॒विक्र॑तु॒मर्चा॑मि स॒त्यस॑वस॒ रत्न॑धा॒मभि॑ प्रि॒यं
 म॒तिमूर्द्ध॑वा यस्या॒मति॑र्भा अ॒दिद्यु॑तथ् स॒वीम॑नि॒ हिर॑ण्य पा॒णिर॑मिमी॒त
 सु॒क्र॒तुः॑ कृ॒पा सु॒वः॑ ।
 प्र॒जा॒भ्य॒स्त्वा प्रा॑णाय॒ त्वा व्या॑नाय॒ त्वा प्र॒जा॒स्त्वम॑नु () प्रा॒णि॒हि
 प्र॒जा॒स्त्वाम॑नु प्रा॒णन्तु॑ ॥ 13

TS 1.2.6.1

अ॒ञ्शु॒ना॑ । ते॒ । अ॒ञ्शुः॑ । पृ॒च्यता॑म् । परु॒षा । परुः॑ । ग॒न्धः । ते॒ ।
 काम॑म् । अ॒वतु॑ । म॒दाय॑ । र॒सः । अ॒च्युतः॑ । अ॒मात्यः॑ । अ॒सि ।
 शु॒क्रः । ते॒ । ग्र॒हः । अ॒भीति॑ । त्यम् । दे॒वम् । स॒वितार॑म् । ऊ॒र्ण्योः॑ ।
 क॒विक्र॑तुमिति॑ क॒वि – क्र॒तुम् । अ॒र्चामि॑ । स॒त्यस॑वसमिति॑
 स॒त्य – स॒वस॑म् । र॒त्नधा॑मिति॑ रत्न – धाम् । अ॒भीति॑ । प्रि॒यम् ।
 म॒तिम् । ऊ॒र्ध्वा । य॒स्य । अ॒मतिः॑ । भाः । अ॒दिद्यु॑तत् । स॒वीम॑नि ।
 हि॒रण्य॑पाणिरिति॑ हि॒रण्य – पा॒णिः । अ॒मिमी॑त । सु॒क्रतु॑रिति॑
 सु – क्र॒तुः । कृ॒पा । सु॒वः ॥ प्र॒जाभ्य॑ इति॑ प्र – जा॒भ्यः । त्वा ।
 प्रा॒णाये॑ति॑ प्र – अ॒नाय॑ । त्वा । व्या॒नाये॑ति॑ वि – अ॒नाय॑ । त्वा ।
 प्र॒जा इति॑ प्र – जाः । त्वम् । अनु॑ () । प्रेति॑ । अ॒निहि॑ ।
 प्र॒जा इति॑ प्र – जाः । त्वाम् । अनु॑ । प्रेति॑ । अ॒नन्तु॑ ॥ 13 (57)

(अनु – सप्त च) (A6)

TS 1.2.7.1

सो॒मं ते॑ क्री॒णाम्यूर्ज॑स्वन्तं॒ पय॑स्वन्तं॒ वी॒र्या॑वन्तं॒ म॒भिमा॑तिषाह॑
 शु॒क्रं ते॑ शु॒क्रेण॑ क्री॒णामि॑ च॒न्द्रं च॒न्द्रेणा॑मृत॒ममृ॑तेन॒ सम्य॑त् ते

गोरस्मे चन्द्राणि तपसस्तनूरसि प्रजापते वर्णस्तस्यास्ते सहस्रपोषं
पुष्यन्त्याश्चरमेण पशुना क्रीणाम्यस्मे ते बन्धुर्मयि ते रायः

श्रयन्तामस्मे ज्योतिः सोमविक्रयिणि तमो मित्रो न एहि सुमित्रधा

इन्द्रस्योरु- ()-मा विश दक्षिण-मुशन्नुशन्तु स्योनः स्योनः

स्वान भ्राजाङ्गारे बंभारे हस्त सुहस्त कृशानवेते वः

सोमक्रयणास्तान् रक्षध्वं मा वो दभन् ॥ 14

TS 1.2.7.1

सोमम् । ते । क्रीणामि । ऊर्जस्वन्तम् । पयस्वन्तम् । वीर्यावन्तमिति

वीर्य - वन्तम् । अभिमातिषाहमित्यभिमाति - साहम् । शुक्रम् । ते ।

शुक्रेण । क्रीणामि । चन्द्रम् । चन्द्रेण । अमृतम् । अमृतेन । सम्यत् ।

ते । गोः । अस्मे इति । चन्द्राणि । तपसः । तनूः । असि ।

प्रजापतेरिति प्रजा - पतेः । वर्णः । तस्याः । ते । सहस्रपोषमिति

सहस्र - पोषम् । पुष्यन्त्याः । चरमेण । पशुना । क्रीणामि ।

अस्मे इति । ते । बन्धुः । मयि । ते । रायः । श्रयन्ताम् ।

अस्मे इति । ज्योतिः । सोमविक्रयिणीति सोम - विक्रयिणि । तमः ।

मि॒त्रः । नः । ए॒ति । इ॒हि । सु॒मि॒त्र॒धा इति॑ सु॒मि॒त्र – धाः । इन्द्र॑स्य ।
ऊ॒रुम् () । ए॒ति । वि॒श । दक्षि॑णम् । उ॒श॒न् । उ॒श॒न्त॑म् । स्यो॒नः ।
स्यो॒नम् । स्वा॒न । भ्रा॒ज । अ॒ङ्गारे॑ । बं॒भारे॑ । ह॒स्त ।

सु॒ह॒स्तेति॑ सु – ह॒स्त । कृ॒शा॒न॒वि॒ति कृ॒श – अ॒नो । ए॒ते । वः ।
सो॒म॒क्र॒य॒णा इति॑ सोम – क्र॒य॒णाः । तान् । र॒क्ष॒ध्वम् । मा । वः ।

द॒भ॒न् ॥ 14 (72) (ऊ॒रुं–द्वा॒विं॒शति॑श्च) (A7)

TS 1.2.8.1

उ॒दा॒यु॒षा स्वा॒यु॒षोदो॑ष॒धीना॑ ७ र॒से॒नोत् प॒र्जन्य॑स्य शु॒ष्मे॒णोद॑स्था–
म॒मृ॒ता ७ अ॒नु ।

उ॒र्व॒न्त॒रि॒क्ष॒म॒न्वि॒ह्यदि॑त्याः स॒दो ऽस्य॑दि॒त्याः स॒द

आ सी॒दा॒स्त॒भ्नाद्–द्या॑मृष॒भो अ॒न्त॒रि॒क्ष॒म॒मि॒मीत॑ व॒रि॒माणं॑ पृथि॒व्या

आ ऽसी॑दद् वि॒श्वा भु॒व॒ना॒नि स॒म्रा॒ड् वि॒श्वे॑त् तानि व॒रु॑णस्य व्र॒तानि॑

व॒नेषु॑ व्य॒न्त॒रि॒क्षं त॒तान॑ वा॒ज॒म॒र्व॒थ्सु॑ प॒यो अ॒घ्नि॒यासु॑ ह॒थ्सु – [] 15

TS 1.2.8.1

उ॒दि॒ति । आ॒यु॒षा । स्वा॒यु॒षेति॑ सु – आ॒यु॒षा ॥ उ॒दि॒ति । ओ॒ष॒धी॒नाम् ।

र॒से॒न । उ॒दि॒ति । प॒र्जन्य॑स्य । शु॒ष्मे॒ण । उ॒दि॒ति । अ॒स्था॒म् । अ॒मृ॒तान् ।

अनु॑ ॥ उ॒रु॑ । अ॒न्तरि॑क्षम् । अ॒न्विति॑ । इ॒हि॒ । अ॒दित्याः॑ । स॒दः॑ ।
 अ॒सि॒ । अ॒दित्याः॑ । स॒दः॑ । ए॒ति॑ । सी॒द॑ । अ॒स्त॒भ्नात्॑ । द्याम् ।
 ऋ॒षभः॑ । अ॒न्तरि॑क्षम् । अ॒मिमी॑त् । व॒रिमा॑णम् । पृ॒थि॒व्याः॑ । ए॒ति॑ ।
 अ॒सीद॑त् । वि॒श्वा॑ ॥ भु॒वनानि॑ । स॒म्राडि॑ति सं - राट् । वि॒श्वा॑ ॥ इत् ।
 तानि॑ । व॒रुण॑स्य । व्र॒तानि॑ । व॒नेषु॑ । वी॒ति॑ । अ॒न्तरि॑क्षम् । त॒तान॑ ।
 वा॒जम् ॥ अ॒र्व॒त्स्वि॒त्यर्व॑त् - सु॒ । प॒यः॑ । अ॒घ्निया॑सु ।
 ह॒त्स्वि॑ति ह॒त् - सु॒ । 15 (50)

TS 1.2.8.2

क्र॒तुं व॑रुणो वि॒क्ष्वग्निं॑ दि॒वि सूर्य॑मदधात् सोममद्रावुदु॒ त्यं जा॒तवे॑दसं
 दे॒वं व॑हन्ति के॒तवः॑ ।
 दृ॒शे वि॒श्वाय॑ सूर्यं ॥

उ॒स्रावे॑तं धूर्॒षाहा॑वनश्रू॒ अवी॑रहणौ ब्र॒ह्मचो॑दनौ व॒रुण॑स्य स्क्॒भन॑मसि
 व॒रुण॑स्य स्क्॒भस॑र्जनमसि प्र॒त्यस्तो॑ व॒रुण॑स्य पा॒शः ॥ 16

TS 1.2.8.2

क्र॒तुम् । व॒रुणः॑ । वि॒क्षु॑ । अ॒ग्निम् । दि॒वि । सूर्य॑म् । अ॒दधा॑त् ।
 सोम॑म् । अ॒द्रौ॑ । उ॒दिति॑ । उ॒ । त्यम् ।

जा॒त॒वे॒द॒स॒मि॒ति॒ जा॒त – वे॒द॒स॒म् । दे॒व॒म् । व॒ह॒न्ति॒ । के॒त॒वः॑ ॥ दृ॒शे॑ ।
 वि॒श्वा॒य । सू॒र्य॑म् ॥ उ॒स्रौ॑ । ए॒ति॒ । इ॒त॒म् । धू॒र्षा॒हा॒वि॒ति॒ धूः-सा॒हौ॑ ।
 अ॒न॒श्रू॑ इ॒ति॒ । अ॒वी॒र॒ह॒णा॒वि॒त्य॒वी॒र – ह॒नौ॑ । ब्र॒ह्म॒चो॒द॒ना॒वि॒ति॒
 ब्र॒ह्म – चो॒द॒नौ॑ । व॒रु॒ण॒स्य॑ । स्क्॒भ॒न॒म् । अ॒सि॒ । व॒रु॒ण॒स्य॑ ।
 स्क्॒भ॒स॒र्ज॒न॒मि॒ति॒ स्क्॒भ – स॒र्ज॒न॒म् । अ॒सि॒ । प्र॒त्य॒स्त॒ इति॒
 प्र॒ति – अ॒स्तः॑ । व॒रु॒ण॒स्य॑ । पा॒शः॑ ॥ 16 (35)

(ह॒थ्सु-पञ्च॒त्रिं॒शच्च॑) (A8)

TS 1.2.9.1

प्र॒ च्य॒व॒स्व॒ भु॒व॒स्प॒ते॒ वि॒श्वा॒न्य॒भि॒ धा॒मा॒नि॒ मा॒ त्वा॑ परि॒प॒री॒ वि॒द॒न्मा॒ त्वा॑
 परि॒प॒न्थि॒नो॑ वि॒द॒न्मा॒ त्वा॒ वृ॒का॑ अ॒घा॒य॒वो॒ मा॒ ग॒न्ध॒र्वो॑ वि॒श्वा॒व॒सु॒रा
 द॒घ॒च्छ॒ये॒नो॑ भू॒त्वा॒ परा॑ प॒त॒ य॒ज॒मा॒न॒स्य॑ नो॒ गृ॒हे॒ दे॒वैः॑ स॒कृ॒तं
 य॒ज॒मा॒न॒स्य॑ स्व॒स्त्य॒य॒न्य॒स्य॒पि॒ प॒न्था॑म॒ग॒स्म॒हि॒ स्व॒स्ति॒गा॒म॒ने॒ह॒सं॑ ये॒न
 वि॒श्वाः॑ परि॒ द्वि॒षो॑ वृ॒ण॒क्ति॑ वि॒न्द॒ते॒ व॒सु॑ न॒मो॑ मि॒त्र॒स्य॑ () व॒रु॒ण॒स्य॑
 च॒क्ष॒से॑ म॒हो॒ दे॒वा॒य॒ तदृ॒तं॑ स॒पर्य॑त॒ दू॒रे॒दृ॒शे॑ दे॒व॒जा॒ता॒य॒ के॒त॒वे॑

दिव॑स्पु॒त्राय॑ सू॒र्याय॑ श॒स॒त वरु॑णस्य॒ स्कं॑भनमसि॒ वरु॑णस्य
स्कं॑भस॒र्जन॑-मस्यु॒न्मु॒क्तो वरु॑णस्य॒ पाशः॑ ॥ 17

TS 1.2.9.1

प्रेति॑ । च्य॒वस्व॑ । भु॒वः । प॒ते । वि॒श्वानि॑ । अ॒भीति॑ । धामा॑नि । मा ।
त्वा । परि॑परीति॒ परि – प॒री । वि॒दत् । मा । त्वा । परि॑पन्थिन॒
इति॑ परि – पन्थिनः॑ । वि॒दन् । मा । त्वा । वृ॒काः । अ॒घाय॑व
इत्य॑घ – यवः॑ । मा । गन्ध॑र्वः । वि॒श्वाव॑सुरिति॒ विश्व॑ – व॒सुः ।
एति॑ । द॒घत् । श्ये॑नः । भू॒त्वा । परे॑ति । प॒त । यज॑मानस्य । नः ।
गृ॒हे । दे॒वैः । स॒सृ॒कृत॑म् । यज॑मानस्य । स्व॒स्त्यय॑नीति॒
स्व॒स्ति – अ॑यनी । अ॒सि । अ॒पीति॑ । पन्था॑म् । अ॒गस्म॑हि ।
स्व॒स्तिगा॑मिति॒ स्व॒स्ति – गा॑म् । अ॒नेह॑सम् । येन॑ । वि॒श्वाः । प॒रीति॑ ।
द्विषः॑ । वृ॒णक्ति॑ । वि॒न्दते॑ । व॒सु । नमः॑ । मि॒त्रस्य॑ () । वरु॑णस्य ।
चक्ष॑से । महः॑ । दे॒वाय॑ । तत् । ऋ॒तम् । स॒पर्य॑त । दू॒रेदृ॑श इति॒
दू॒रे – दृ॑शे । दे॒वजा॑तायेति॒ दे॒व – जा॑ताय । के॒तवे॑ । दि॒वः ।
पु॒त्राय॑ । सू॒र्याय॑ । श॒स॒त । वरु॑णस्य । स्कं॑भनम् । अ॒सि ।

वरुणस्य । स्कं॒भस॒र्जन॒मिति॑ स्कं॒भ – सर्ज॑नम् । अ॒सि॒ ।

उ॒न्मु॒क्त इ॒त्युत् – मु॒क्तः । वरुण॑स्य । पाशः॑ ॥ 17 (73)

(मि॒त्रस्य॑-त्रयो॒विंश॑तिश्च) (A9)

TS 1.2.10.1

अ॒ग्ने-रा॒तिथ्य॑म॒सि वि॒ष्णवे॑ त्वा सोम॑स्याऽऽति॒थ्यम॒सि वि॒ष्णवे॑ त्वा
 ऽति॑थेरा॒तिथ्य॑म॒सि वि॒ष्णवे॑ त्वा ऽग्नये॑ त्वा रा॒यस्पो॒षदा॑व्.न्ने वि॒ष्णवे॑ त्वा
 श्ये॑नाय॒ त्वा सोम॑भृते वि॒ष्णवे॑ त्वा या ते॑ धामा॒नि ह॒विषा॑ यज॒न्ति ता
 ते वि॒श्वा परि॑भूर॒स्तु य॒ज्ञं ग॒यस्फा॑नः प्र॒तर॑णः सु॒वीरो ऽवी॑रहा प्र च॒रा
 सोम॑ दु॒र्या॒नदि॒त्याः सदो॑ ऽस्यदि॒त्याः सद॑ आ – [] 18

TS 1.2.10.1

अ॒ग्नेः । आ॒तिथ्य॑म् । अ॒सि । वि॒ष्णवे॑ । त्वा । सोम॑स्य । आ॒तिथ्य॑म् ।
 अ॒सि । वि॒ष्णवे॑ । त्वा । अ॒तिथेः॑ । आ॒तिथ्य॑म् । अ॒सि । वि॒ष्णवे॑ ।
 त्वा । अ॒ग्नये॑ । त्वा । रा॒यस्पो॒षदा॑व्.न्न इति॑ रा॒यस्पो॒ष – दा॑व्.न्ने ।
 वि॒ष्णवे॑ । त्वा । श्ये॑नाय॒ त्वा । सोम॑भृते इति॑ सोम – भृते॑ ।
 वि॒ष्णवे॑ । त्वा । या । ते । धामा॑नि । ह॒विषा॑ । यज॒न्ति । ता । ते ।

विश्वा॑ । परि॒भूरि॑ति परि – भूः । अ॒स्तु॑ । य॒ज्ञम् । ग॒यस्फा॑न इति
 ग॒य – स्फा॑नः । प्र॒तर॑ण इति प्र – तर॑णः । सु॒वीर॑ इति सु-वीरः॑ ।
 अ॒वीर॑हेत्यवीर – हा । प्रेति॑ । च॒र । सोम॑ । दु॒र्यान् । अ॒दित्याः॑ ।
 स॒दः । अ॒सि॑ । अ॒दित्याः॑ । स॒दः । एति॑ । 18 (50)

TS 1.2.10.2

सी॒द वरु॑णो ऽसि॑ धृ॒तव्र॑तो वारु॒णम॑सि शँ॒योर्दे॑वानां॑ स॒ख्यान्मा
 दे॒वानां॑-म॒पस॑श्छि॒थ्स्मह्या॑पतये त्वागृ॒ह्णामि॑ परिपतये त्वा गृ॒ह्णामि॑
 तनू॑न॒प्त्रे॑ त्वागृ॒ह्णामि॑ शा॒क्वरा॑य त्वा गृ॒ह्णामि॑ श॒क्मन्नो॑जिष्ठाय त्वा
 गृ॒ह्णाम्य॑-ना॒धृष्ट॑मस्य-ना॒धृष्यं॑ दे॒वाना॑मो॒जो ऽभि॑शस्ति॒पा
 अ॒नभि॑शस्ते॒न्य-म॑नु मे दी॒क्षां दी॒क्षा॑पति र्म॒न्यता॑मनु
 तप॑स्तपस्पतिर॒ज्जसा॑ स॒त्यमु॑प गेष॑ सु॒विते॑ मा () धाः ॥ 19

TS 1.2.10.2

सी॒द । वरु॑णः । अ॒सि॑ । धृ॒तव्र॑त इति धृ॒त – व्र॑तः । वारु॒णम् ।
 अ॒सि॑ । शँ॒योरि॑ति शं – योः । दे॒वाना॑म् । स॒ख्यात् । मा । दे॒वाना॑म् ।
 अ॒पसः॑ । छि॒थ्स्महि॑ । आ॒पत॑य इत्या – प॒तये॑ । त्वा । गृ॒ह्णामि॑ ।

परि॑पत॒य इति॑ परि – प॒तये॑ । त्वा । गृ॒ह्णामि॑ । त॒नू॒न॒प्त्र इति॑
 त॒नू॑ – न॒प्त्रे॑ । त्वा । गृ॒ह्णामि॑ । शा॒क्व॒राय॑ । त्वा । गृ॒ह्णामि॑ । श॒क्मन्॑ ।
 ओ॒जि॒ष्ठाय॑ । त्वा । गृ॒ह्णामि॑ । अ॒ना॒धृ॒ष्टमि॒त्यना॑ – धृ॒ष्टम् । अ॒सि॒ ।
 अ॒ना॒धृ॒ष्यमि॒त्यना॑ – धृ॒ष्यम् । दे॒वाना॑म् । ओ॒जः॑ । अ॒भि॒श॒स्ति॒पा
 इत्य॑भि॒श॒स्ति – पाः॑ । अ॒न॒भि॒श॒स्ते॒न्यमि॒त्यन॑भि – श॒स्ते॒न्यम् ।
 अ॒न्विति॑ । मे॒ । दी॒क्षाम् । दी॒क्षा॒पति॑रिति॑ दी॒क्षा – प॒तिः॑ । म॒न्य॒ताम् ।
 अ॒न्विति॑ । तपः॑ । तप॑स्पति॒रिति॑ तपः॑ – प॒तिः॑ । अ॒ज्ज॒सा । स॒त्यम् ।
 उ॒पेति॑ । गे॒षम् । सु॒विते॑ । मा () । धाः॑ ॥ 19 (51)

(अमै-कं च) (A10)

TS 1.2.11.1

अ॒ञ्शु॒रञ्शु॒स्ते दे॒व सो॒माऽऽ प्या॑यता॒-मि॒न्द्रायै॑क॒धन॑वि॒द आ
 तु॒भ्यमि॒न्द्रः प्या॑यता॒मा त्वमि॒न्द्राय॑ प्या॒यस्वाऽऽ प्या॑यय॒ सखी॑न्थ
 स॒न्या मे॒धया॑ स्व॒स्ति ते॑ दे॒व सो॒म सु॒त्याम॑शी॒येष्टा॑ रा॒यः प्रे॒षे
 भ॒गाय॑र्त॒मृ॒तवा॑दि॒भ्यो नमो॑ दि॒वे नमः॑ पृ॒थिव्या॑ अ॒ग्ने व्र॑त॒पते॑ त्वं
 व्र॑तानां॑ व्र॒तप॑ति॒रसि॒ या मम॑ त॒नू॒रेषा॑ सा त्वयि॑ – [] 20

TS 1.2.11.1

अ॒शु॒र॒शु॒रि॒त्य॒शुः॑ – अ॒शुः॑ । ते॒ । दे॒व । सो॒म । ए॒ति॑ ।
 प्या॒य॒ता॒म् । इन्द्रा॑य । ए॒क॒ध॒न॒वि॒द इत्ये॑क॒ध॒न – वि॒दे॑ ॥ ए॒ति॑ । तु॒भ्य॑म् ॥
 इन्द्रः॑ । प्या॒य॒ता॒म् । ए॒ति॑ । त्व॒म् । इन्द्रा॑य । प्या॒य॒स्व । ए॒ति॑ । प्या॒य॒य ।
 स॒खी॑न् । स॒न्या । मे॒धया॑ ॥ स्व॒स्ति॑ । ते॒ । दे॒व । सो॒म । सु॒त्या॑म् ।
 अ॒शी॒य । ए॒ष्टः । रा॒यः । प्रे॒ति॑ । इ॒षे । भ॒गा॒य । ऋ॒त॒म् ।
 ऋ॒त॒वा॒दि॒भ्य इत्यृ॑त॒वा॒दि – भ्यः॑ । न॒मः । दि॒वे । न॒मः । पृ॒थि॒व्यै ।
 अ॒ग्ने॑ ॥ व्र॒त॒प॒त इति॑ व्र॒त – प॒ते॑ । त्व॒म् । व्र॒ता॒ना॒म् । व्र॒त॒प॒ति॒रिति॑
 व्र॒त – प॒तिः॑ । अ॒सि॑ । या । म॒म । त॒नूः । ए॒षा । सा । त्व॒यि॑ । 20 (50)

TS 1.2.11.2

या॑ त॒व त॒नू॒रि॒य॒सा॑ म॒यि॑ स॒ह नौ॑ व्र॒त॒प॒ते व्र॒ति॒नो॑र्व्र॒तानि॑
 या॑ ते॒ अ॒ग्ने॑ रु॒द्रि॒या त॒नू॒स्त॒या नः॑ पा॒हि॒ तस्या॑स्ते॒ स्वाहा॑
 या॑ ते॒ अ॒ग्ने॑ ऽया॒शया॑ र॒जा॒शया॑ ह॒रा॒शया॑ त॒नू॒र्वर्षि॑ष्ठा ग॒ह्वरे॑ष्ठो॒ग्रं
 व॒चो॑ अ॒पा॒व॒धीं॑ त्वे॒षं व॒चो॑ अ॒पा॒व॒धी॑ स्वाहा॑ ॥ 21

TS 1.2.11.2

या । तव । त॒नूः । इ॒यम् । सा । म॒यि । स॒ह । नौ । व्र॒त॒प॒त इति॑
 व्र॒त – प॒ते । व्र॒ति॒नोः॑ । व्र॒तानि॑ । या । ते । अ॒ग्ने । रु॒द्रि॒या । त॒नूः ।
 तया॑ । नः । पा॒हि । तस्याः॑ । ते । स्वाहा॑ । या । ते । अ॒ग्ने ।
 अ॒या॒श॒येत्य॑या – श॒या । र॒जा॒श॒येति॑ र॒जा – श॒या ।
 ह॒रा॒श॒येति॑ ह॒रा – श॒या । त॒नूः । व॒र्षि॒ष्ठा । ग॒ह्व॒रे॒ष्ठेति॑ ग॒ह्व॒रे – स्था ।
 उ॒ग्रम् । व॒चः । अ॒पेति॑ । अ॒व॒धीम् । त्वे॒षम् । व॒चः । अ॒पेति॑ ।
 अ॒व॒धीम् । स्वाहा॑ ॥ 21 (40) (त्व॒यि-च॒त्वारि॑ञ्च॒) (A11)

TS 1.2.12.1

वि॒त्ता॒य॒नी॑ मे ऽसि॑ ति॒क्ता॒य॒नी॑ मे ऽस्य॑व॒ता॒न्मा॑ नाथि॒त॒म॒व॒ता॒न्मा॑ व्यथि॒तं
 वि॒दे॒र॒ग्नि॒र्न॒भो॑ ना॒मा॒ग्ने॑ अ॒ङ्गि॒रो॒ यो॑ ऽस्यां॑ पृथि॒व्या॑म॒स्या॒यु॒षा॑ ना॒म्ने॒हि
 यत् ते॑ ऽना॒धृ॒ष्टं॑ ना॒म॒ य॒ज्ञि॒यं॑ ते॒न॒ त्वा॒ऽऽ द॒धे॑ ऽग्ने॑ अ॒ङ्गि॒रो॒ यो
 द्वि॒ती॒य॒स्यां॑ तृ॒ती॒य॒स्यां॑ पृथि॒व्या-म॒स्या॒यु॒षा॑ ना॒म्ने॒हि
 यत् ते॑ ऽना॒धृ॒ष्टं॑ ना॒म – [] 22

TS 1.2.12.1

वि॒त्ता॒य॒नी॑ति॑ वि॒त्त – अ॒य॒नी॑ । मे । अ॒सि॑ । ति॒क्ता॒य॒नी॑ति॑
 ति॒क्त – अ॒य॒नी॑ । मे । अ॒सि॑ । अ॒व॒ता॒त् । मा॒ । ना॒थि॒त॒म् । अ॒व॒ता॒त् ।

मा । व्यथितम् । विदेः । अग्निः । नभः । नाम । अग्ने । अङ्गिरः ।
यः । अस्याम् । पृथिव्याम् । असि । आयुषा । नाम्ना । एति । इहि ।
यत् । ते । अनाधृष्टमित्यना – धृष्टम् । नाम । यज्ञियम् । तेन ।
त्वा । एति । दधे । अग्ने । अङ्गिरः । यः । द्वितीयस्याम् । तृतीयस्याम् ।
पृथिव्याम् । असि । आयुषा । नाम्ना । एति । इहि । यत् । ते ।
अनाधृष्टमित्यना – धृष्टम् । नाम । 22 (50)

TS 1.2.12.2

यज्ञियं तेन त्वाऽऽ दधे सिंहीरसि महिषीरस्युरु प्रथस्वोरु
ते यज्ञपतिः प्रथतां ध्रुवाऽसि देवेभ्यः शुन्धस्व देवेभ्यः
शुंभस्वेन्द्रघोषस्त्वा वसुभिः पुरस्तात् पातु मनोजवास्त्वा पितृभि
र्दक्षिणतः पातु प्रचेतास्त्वा रुद्रैः पश्चात् पातु विश्वकर्मा
त्वा ऽऽदित्यैरुत्तरतः पातु सिंहीरसि सपत्नसाही स्वाहा
सिंहीरसि सुप्रजावनिः स्वाहा सिंही – [] 23

TS 1.2.12.2

यज्ञियम् । तेन । त्वा । एति । दधे । सिंहीः । असि । महिषीः ।
असि । उरु । प्रथस्व । उरु । ते । यज्ञपतिरिति यज्ञ – पतिः ।

प्र॒थ॒ता॒म् । ध्रु॒वा । अ॒सि॒ । दे॒वे॒भ्यः॑ । शु॒न्ध॒स्व । दे॒वे॒भ्यः॑ । शु॒ंभ॒स्व ।
 इ॒न्द्र॒घो॒ष इ॒तीन्द्र॑ – घो॒षः । त्वा । व॒सु॒भिरि॒ति व॒सु – भिः॑ ।
 पु॒र॒स्तात् । पा॒तु॒ । म॒नो॒ज॒वा इति॑ म॒नः – ज॒वाः । त्वा । पि॒तृ॒भिरि॒ति
 पि॒तृ – भिः॑ । द॒क्षि॒णतः॑ । पा॒तु॒ । प्र॒चे॒ता इति॑ प्र – चे॒ताः । त्वा ।
 रु॒द्रैः । प॒श्चात् । पा॒तु॒ । वि॒श्व॒क॒र्मेति॑ वि॒श्व – क॒र्मा । त्वा ।
 आ॒दि॒त्यैः । उ॒त्तर॑त इत्युत् – त॒रतः॑ । पा॒तु॒ । सि॒ं॒हीः । अ॒सि॒ ।
 स॒प॒न्न॒सा॒हीति॑ स॒प॒न्न – सा॒ही । स्वाहा॑ । सि॒ं॒हीः । अ॒सि॒ ।
 सु॒प्र॒जा॒व॒निरि॒ति सु॒प्र॒जा – व॒निः । स्वाहा॑ । सि॒ं॒हीः । 23 (50)

TS 1.2.12.3

र॒सि॑ रा॒य॒स्पो॒ष॒व॒निः॑ स्वाहा॑ सि॒ं॒ही॒र॒स्यादि॒त्य॒व॒निः॑ स्वाहा॑
 सि॒ं॒ही॒र॒स्या॑ व॒ह दे॒वान् दे॒व॒य॒ते॑ य॒ज॒मा॒नाय॑ स्वाहा॑ भू॒ते॒भ्य॒स्त्वा
 वि॒श्वायु॑र॒सि पृ॒थि॒वीं दृ॒ह ध्रु॒व॒क्षि॒द॒स्य॒न्तरि॑क्षं दृ॒हा॒च्यु॒त॒क्षि॒द॒सि
 दि॒वं दृ॒हा॒ग्ने॑ र्भ॒स्मा॒स्य॒ग्नेः॑ पु॒री॒ष॒म॒सि ॥ 24

TS 1.2.12.3

अ॒सि॒ । रा॒य॒स्पो॒ष॒व॒निरि॒ति॑ रा॒य॒स्पो॒ष – व॒निः॑ । स्वाहा॑ । सि॒ं॒हीः॑ ।
 अ॒सि॒ । आ॒दि॒त्य॒व॒निरि॒त्यादि॒त्य – व॒निः॑ । स्वाहा॑ । सि॒ं॒हीः॑ ।

अ॒सि॒ । ए॒ति॒ । व॒ह॒ । दे॒वान् । दे॒व॒य॒त इति॑ दे॒व – य॒ते॒ । य॒ज॒मा॒नाय॑ ।
 स्वा॒हा॑ ॥ भू॒ते॒भ्यः॑ । त्वा॒ । वि॒श्वा॒यु॒रिति॑ वि॒श्व – आ॒युः॑ । अ॒सि॒ ।
 पृ॒थि॒वीम् । दृ॒ह॒ । ध्रु॒व॒क्षि॒दिति॑ ध्रु॒व – क्षि॒त् । अ॒सि॒ ।
 अ॒न्त॒रि॒क्षम् । दृ॒ह॒ । अ॒च्यु॒त॒क्षि॒दित्य॑च्यु॒त – क्षि॒त् । अ॒सि॒ ।
 दि॒वम् ॥ दृ॒ह॒ । अ॒ग्नेः॑ । भ॒स्म॑ । अ॒सि॒ । अ॒ग्नेः॑ ।
 पु॒री॒षम् । अ॒सि॒ ॥ 24 (35)

(नाम॑-सुप्रजा॒वनिः॑ स्वाहा॒ सि॒हीः-पञ्च॑त्रि॒शच्च॑) (A12)

TS 1.2.13.1

यु॒ञ्ज॒ते॒ मन॑ उ॒त यु॒ञ्ज॒ते॒ धियो॑ वि॒प्रा वि॒प्रस्य॑ बृ॒ह॒तो॒ वि॒प॒श्चितः॑ ।
 वि॒ हो॒त्रा द॒धे व॒युना॑ वि॒दे॒क इ॒न्म॒ही दे॒वस्य॑ स॒वितुः॑ परि॒ष्टुतिः॑ ॥
 सु॒वाग्-दे॒व दु॒र्या॑ आ॒ वद॑ दे॒वश्रु॑तौ॒ दे॒वेष्वा॑ घो॒षेथा॑मा नो॒
 वी॒रो जा॑य॒तां क॒र्म॒ण्यो य॑ सर्वे॒ ऽनु॑ जी॒वाम॑ यो ब॒हूना॑म॒सद्-व॒शी ।
 इ॒दं वि॒ष्णु॑र्वि॒ च॒क्रमे॑ त्रे॒था नि॑ द॒धे प॒दं ।
 स॒मू॒ढम॑स्य – [] 25

TS 1.2.13.1

यु॒ञ्जते॑ । मनः॑ । उ॒त । यु॒ञ्जते॑ । धि॒यः॑ । वि॒प्राः॑ । वि॒प्रस्य॑ । बृ॒हतः॑ ।
 वि॒पश्चितः॑ ॥ वी॒ति॑ । हो॒त्राः॑ । द॒धे॑ । व॒युना॑वि॒दिति॑ व॒युन॑ – वि॒त् ।
 ए॒कः॑ । इ॒त् । म॒ही । दे॒वस्य॑ । स॒वितुः॑ । परि॑ष्टु॒तिरिति॑ परि॑ – स्तु॒तिः॑ ॥
 सु॒वागिति॑ सु॒ – वाक् । दे॒व । दु॒र्यान् । ए॒ति॑ । व॒द । दे॒वश्रु॑ता॒विति॑
 दे॒व – श्रु॑तौ । दे॒वेषु॑ । ए॒ति॑ । घो॒षेथा॑म् । ए॒ति॑ । नः॑ । वी॒रः॑ ।
 जा॒यता॑म् । क॒र्मण्यः॑ । यम् । स॒र्वे॑ । अ॒नुजी॑वा॒मेत्यनु॑ – जी॒वाम॑ ।
 यः । ब॒हूना॑म् । अ॒सत् । व॒शी ॥ इ॒दम् । वि॒ष्णुः॑ । वी॒ति॑ । च॒क्रमे॑ ।
 त्रे॒धा । नी॒ति॑ । द॒धे॑ । प॒दम् ॥

स॒मूढ॑मि॒ति॒ सम् – ऊ॒ढम् । अ॒स्य॑ । 25 (50)

TS 1.2.13.2

पा॒ँसुर॑ इ॒राव॑ती धे॒नुम॑ती हि भू॒तँ सू॑य॒वसि॑नी॒ मन॑वे य॒शस्ये॑ ॥
 व्य॑स्क॒भ्नाद्रो॑द॒सी वि॒ष्णुरे॑ते द॒धार॑ पृथि॒वीम॑भितो म॒यूखैः॑ ॥
 प्रा॒ची प्रे॑तम॒ध्वरं॑ क॒ल्पय॑न्ती ऊ॒र्ध्वं य॒ज्ञं न॑य॒तं मा जी॑ह्वर॒तम॑त्र
 रमे॒थां व॑र्ष्मन् पृथि॒व्या दि॒वो वा वि॒ष्णवु॑त वा पृथि॒व्या म॒हो वा
 वि॒ष्णवु॑त वा ऽन्तरि॒क्षाब्द॑स्तौ पृण॒स्व बहु॑भिर्व॒सव्यै॑रा प्र य॒च्छ – [] 26

TS 1.2.13.2

पा॒सुरे॑ । इ॒रा॒वती॑ इ॒तीरा॑ – व॒ती । धे॒नु॒मती॑ इति॑ धे॒नु – म॒ती॑ । हि ।
 भू॒तम् । सू॒य॒व॒सिनी॑ इति॑ सु – य॒व॒सिनी॑ । म॒न॒वे । य॒श॒स्ये॑ इति॑ ॥
 वी॒ति । अ॒स्क॒भ्नात् । रो॒द॒सी इति॑ । वि॒ष्णुः । ए॒ते इति॑ । दा॒धार ।
 पृ॒थि॒वीम् । अ॒भितः॑ । म॒यू॒खैः ॥ प्रा॒ची इति॑ । प्रे॒ति । इ॒तम् ।
 अ॒ध्व॒रम् । क॒ल्प॒यन्ती॑ इति॑ । ऊ॒र्ध्व॒म् । य॒ज्ञम् । न॒य॒तम् । मा ।
 जी॒ह्व॒र॒तम् । अ॒त्र । र॒मे॒थाम् । व॒र्ष्म॒न् । पृ॒थि॒व्याः । दि॒वः । वा ।
 वि॒ष्णो । उ॒त । वा । पृ॒थि॒व्याः । म॒हः । वा । वि॒ष्णो । उ॒त । वा ।
 अ॒न्त॒रि॒क्षात् । ह॒स्तौ । पृ॒ण॒स्व । ब॒हु॒भि॒रिति॑ ब॒हु – भिः॑ । व॒स॒व्यैः॑ ।
 आ । प्रे॒ति । य॒च्छ । 26 (50)

TS 1.2.13.3

दक्षि॑णादो॒त स॒व्यात् ।
 वि॒ष्णो॒र्नु॒कं॑ वी॒र्या॑णि प्र वो॒चं॑ यः पा॒र्थि॒वानि॑ वि॒म॒मे र॒जा॒सि॑ यो
 अ॒स्क॒भा॒य॒दु॒त्तर॑ स॒ध॒स्थं॑ वि॒च॒क्र॒मा॒ण स्त्रे॒धो॒रु॒गा॒यो
 वि॒ष्णो॑ र॒रा॒ट॒म॒सि॑ वि॒ष्णोः॑ पृ॒ष्ठ॒म॒सि॑ वि॒ष्णोः॑ इ॒ज॒प्त्रे॑ स्थो
 वि॒ष्णोः॑ स्यूर॑सि॒ वि॒ष्णो॑ ध्रु॒व॒म॒सि॑ वै॒ष्णा॒व॒म॒सि॑ वि॒ष्णा॒वे॒ त्वा ॥ 27

TS 1.2.13.3

दक्षिणात् । एति । उत । सव्यात् ॥ विष्णोः । नुकम् । वीर्याणि ।
 प्रेति । वोचम् । यः । पार्थिवानि । विमम इति वि – ममे ।
 रजाँसि । यः । अस्कभायत् । उत्तरमित्युत् – तरम् ।
 सधस्थमिति सध – स्थम् । विचक्रमाण इति वि – चक्रमाणः ।
 त्रेधा । उरुगाय इत्युरु – गायः । विष्णोः । रराटम् । असि । विष्णोः ।
 पृष्ठम् । असि । विष्णोः । श्रजत्रे इति । स्थः । विष्णोः । स्यूः । असि ।
 विष्णोः । ध्रुवम् । असि । वैष्णवम् । असि । विष्णवे । त्वा ॥ 27 (39)

(अस्य-यच्छै-कान्न चत्वारिँशच्च) (A13)

TS 1.2.14.1

कृणुष्व पाजः प्रसितिं न पृथ्वीं ँयाहि राजेवामवाँ इभेन ।
 तृष्वीमनु प्रसितिं-दूणानो ऽस्ता ऽसि विद्ध्य रक्षस स्तपिष्ठैः ॥
 तव भ्रमास आशुया पतंत्यनु स्पृश धृषता शोशुचानः ।
 तपूँष्यग्ने जुह्वा पतङ्गानसन्दितो वि सृज विष्वगुल्काः ॥
 प्रतिस्पशो विसृज-तूर्णितमो भवा पायुर्विशो अस्या अदब्धः ।
 यो नो दूरे अघशँसो – [] 28

TS 1.2.14.1

कृ॒णु॒ष्व । पा॒जः । प्र॒सि॒ति॒मि॒ति॒ प्र – सि॒ति॒म् । न । पृ॒थ्वी॒म् । या॒हि ।
 ॥
 रा॒जा । इ॒व । अ॒म॒वा॒नि॒त्य॒म – वा॒न् । इ॒भे॒न ॥ तृ॒ष्वी॒म् । अ॒न्वि॒ति॒ ।
 प्र॒सि॒ति॒मि॒ति॒ प्र – सि॒ति॒म् । द्रू॒णा॒नः । अ॒स्ता ॥ अ॒सि॒ । वि॒द्ध्य॑ ।
 र॒क्ष॒सः । त॒पि॒ष्ठैः ॥ त॒व । भ्र॒मा॒सः । आ॒शु॒या । प॒त॒न्ति॒ । अ॒न्वि॒ति॒ ।
 स्पृ॒श । धृ॒ष॒ता । शो॒शु॒चा॒नः ॥ त॒पू॒ष्पि॒ । अ॒ग्ने॒ । जु॒ह्वा ॥ प॒त॒ङ्गान्॑ ।
 अ॒स॒न्दि॒त इ॒त्य॒सं – दि॒तः । वी॒ति॒ । सृ॒ज॒ । वि॒ष्वक् । उ॒ल्काः ॥
 प्र॒ती॒ति॒ । स्पृ॒शः । वी॒ति॒ । सृ॒ज॒ । तू॒र्णि॒त॒म इति॑ तू॒र्णि – त॒मः ।
 भ॒व । पा॒युः । वि॒शः । अ॒स्याः । अ॒द॒ब्दः ॥ यः । नः । दू॒रे॒ ।

अ॒घ॒श॒स इ॒त्य॒घ – श॒सः । 28 (50)

TS 1.2.14.2

यो अ॒न्त्य॒ग्ने॒ मा॒कि॒ष्टे॒ व्य॒थि॒रा द॒धर्षी॑त् ॥
 उ॒द॒ग्ने॒ ति॒ष्ठ प्र॒त्याऽऽ त॒नु॒ष्व न्य॒मि॒त्रा॒ ओष॑तात् ति॒ग्म॒हे॒ते॒ ।
 यो नो अ॒रा॒ति॒ समि॑धान च॒क्रे नी॒चा तं ध॑क्ष्य॒त॒सं न शु॒ष्कं ॥
 ऊ॒र्ध्वो भ॒व प्र॒ति वि॒द्ध्य॒द्ध्य॒स्मदा॒वि॒ष्कृ॒णु॒ष्व दै॒व्या॑न्यग्ने॒ ।

अव॑ स्थि॒रा तनु॑हि या॒तु॒जूनां॑ जा॒मिम॑जा॒मिं प्र॑ मृ॒णीहि॑ शत्रून् ॥

स ते॑ – [] 29

TS 1.2.14.2

यः॑ । अ॒न्ति॑ । अ॒ग्ने॑ । मा॒क्रिः॑ । ते॒ । व्य॑थिः । ए॒ति॑ । द॒ध॒र्षी॑त् ॥
उ॒दि॒ति॑ । अ॒ग्ने॑ । ति॒ष्ठ॑ । प्र॒ति॑ । ए॒ति॑ । त॒नु॒ष्व॑ । नी॒ति॑ । अ॒मि॒त्रान्॑ ।
ओ॒ष॒तात् । ति॒ग्म॒हे॒त॒ इति॑ ति॒ग्म॑ – हे॒ते ॥ यः॑ । नः॑ । अ॒रा॒तिम्॑ ।
स॒मि॒धा॒ने॒ति॑ स॒म् – इ॒धा॒न॑ । च॒क्रे॑ । नी॒चा॑ । त॒म् । ध॒क्षि॑ । अ॒त॒स॒म् ।
न॑ । शु॒ष्क॒म् ॥ ऊ॒र्ध्वः॑ । भ॒व॑ । प्र॒ती॒ति॑ । वि॒द्ध्य॑ । अधी॒ति॑ ।
अ॒स्मत्॑ । आ॒विः॑ । कृ॒णु॒ष्व॑ । दै॒व्या॑नी । अ॒ग्ने॑ ॥ अ॒वे॒ति॑ । स्थि॒रा ।
त॒नु॒हि॑ । या॒तु॒जूना॑म् । जा॒मि॒म् । अ॒जा॒मि॒म् । प्रे॒ति॑ । मृ॒णी॒हि॑ ।
शत्रून्॑ ॥ सः॑ । ते॒ । 29 (50)

TS 1.2.14.3

जा॒ना॒ति॑ सु॒म॒तिं॑ य॒वि॒ष्ठ॒य॑ ई॒व॒ते॒ ब्र॒ह्म॒णे॑ गा॒तु॒मै॒रत्॑ ।
वि॒श्वा॒न्य॒स्मै॑ सु॒दि॒ना॒नि॑ रा॒यो द्यु॒म्ना॒न्य॒र्यो॑ वि॒ दुरो॑ अ॒भि द्यौ॑त् ॥
से॒द॒ग्ने॑ अ॒स्तु॑ सु॒भ॒गः॑ सु॒दा॒नु॒र्य॑स्त्वा॒ नित्ये॑न॒ ह॒वि॒षाय॑ उ॒क्थैः॑ ।

पि॒प्री॑षति॒ स्व आयु॑षि॒ दुरो॑णे॒ विश्वे॑दस्मै॒ सुदि॒ना सा ऽसदि॑ष्टिः ॥

अर्चा॑मि ते सु॒मतिं॑ घोष्य॒र्वाक् सं ते॑ वा॒वाता॑ जरता – [] 30

TS 1.2.14.3

जा॒नाति॑ । सु॒मति॑मिति॒ सु – म॒तिम् । य॒विष्ट॑ । यः । ई॒वते॑ । ब्र॒ह्मणे॑ ।
गा॒तुम् । ऐ॒रत् ॥ वि॒श्वानि॑ । अ॒स्मै । सु॒दिना॑नीति॒ सु – दि॒नानि॑ ।
रा॒यः । द्यु॒म्नानि॑ । अ॒र्यः । वी॒ति । दुरः॑ । अ॒भीति॑ । द्यौत् ॥ सः । इत् ।
अ॒ग्ने । अ॒स्तु । सु॒भग॑ इति॒ सु – भगः॑ । सु॒दानु॑रिति॒ सु – दानुः॑ ।
यः । त्वा । नि॒त्येन॑ । ह॒विषा॑ । यः । उ॒क्थैः ॥ पि॒प्रीषति॑ । स्वे ।
आयु॑षि । दुरो॑ण इति॒ दुः – ओ॒ने । वि॒श्वा ॥ इत् । अ॒स्मै । सु॒दिने॑ति॒
सु– दि॒ना ॥ सा । अ॒सत् । इ॒ष्टिः ॥ अर्चा॑मि । ते । सु॒मति॑मिति॒
सु – म॒तिम् । घोषि॑ । अ॒र्वाक् । स॒मिति॑ । ते ।

वा॒वाता॑ । जर॒तां । 30 (50)

TS 1.2.14.4

मि॒यंगीः॑ । स्व॒श्वास्त्वा॑ सु॒रथा॑ म॒र्जये॑मा॒स्मे क्ष॒त्राणि॑ धा॒रये॑रनु॒ द्यून् ॥
इ॒ह त्वा॑ भूर्या॑ च॒रेदु॑प॒ त्मन् दोषा॑वस्त॒ दी॒दिवा॑ ऽस॒मनु॑ द्यून् ।
क्री॑ड॒न्तस्त्वा॑ सु॒मन॑सः स॒पेमा॑भि॒ द्यु॒म्ना त॑स्थि॒वा ऽसो॑ ज॒नानां॑ ॥

यस्त्वा स्वश्वः सुहिरण्यो अग्न उपयाति वसुमता रथेन ।
 तस्य त्राता भवसि तस्य सखा यस्त आतिथ्य मानुषग् जुजोषत् ॥
 महो रुजामि – [] 31

TS 1.2.14.4

इयम् । गीः ॥ स्वश्वा इति सु – अश्वाः । त्वा । सुरथा इति
 सु – रथाः । मर्जयेम । अस्मे इति । क्षत्राणि । धारयेः । अन्विति ।
 द्यून् ॥ इह । त्वा । भूरि । एति । चरेत् । उपेति । त्मन् ।
 दोषावस्तरिति दोषा – वस्तः । दीदिवाऽसम् । अन्विति । द्यून् ॥
 क्रीडन्तः । त्वा । सुमनस इति सु – मनसः । सपेम । अभीति ।
 द्युम्ना । तस्थिवाऽसः । जनानाम् ॥ यः । त्वा । स्वश्च इति
 सु – अश्वः । सुहिरण्य इति सु – हिरण्यः । अग्ने ।
 उपयातीत्युप – याति । वसुमतेति वसु – मता । रथेन ॥ तस्य ।
 त्राता । भवसि । तस्य । सखा । यः । ते । आतिथ्यम् । आनुषक् ।
 जुजोषत् ॥ महः । रुजामि । 31 (50)

TS 1.2.14.5

बन्धु॑ता वचो॑भिस्तन्मा॑ पितु॑र्गोत॑माद-न्वियाय॑ ।
 त्वं नो॑ अस्य॑ वचस-श्चिकि॑द्धि होत॑र्यविष्ठ सु॒क्रतो॑ दमू॒नाः ॥
 अस्व॑प्नज स्त॒रणयः॑ सु॒शेवा॑ अतन्द्रा॑ सो ऽवृ॒का अश्र॑मिष्ठाः ।
 ते पा॒यवः॑ स॒द्धि॒यञ्चो॑ निष॒द्याऽग्ने॑ तव॑ नः पा॒न्त्वमू॑र ॥
 ये पा॒यवो॑ माम॒तेयं॑ते अग्ने॑ पश्य॑न्तो अ॒न्धं दु॑रि॒ताद॑रक्षन् ।
 ररक्ष॑तान् सु॒क्रतो॑ विश्व॑वेदा दि॒प्सन्त॑ इद्-रि॒पवो॑ ना ह - [] 32

TS 1.2.14.5

बन्धु॑ता । वचो॑भिरिति॑ वचः - भिः । तत् । मा । पितुः । गोत॑मात् ।
 अन्वि॑ति । इ॒याय॑ ॥ त्वम् । नः । अस्य॑ । वचसः॑ । चिकि॑द्धि । होतः॑ ।
 यविष्ठ॑ । सु॒क्रतो॑ इति॑ सु - क्रतो॑ । दमू॒नाः ॥ अस्व॑प्नज
 इत्य॑स्वप्न - जः । त॒रणयः॑ । सु॒शेवा॑ इति॑ सु-शेवाः॑ । अतन्द्रा॑सः ।
 अ॒वृ॒काः । अश्र॑मिष्ठाः ॥ ते । पा॒यवः॑ । स॒द्धि॒यञ्चः॑ । निष॒द्येति॑
 नि - सद्य॑ । अग्ने॑ । तव॑ । नः । पा॒न्तु । अ॒मूर॑ ॥ ये । पा॒यवः॑ ।
 मा॒म॒तेय॑म् । ते । अग्ने॑ । पश्य॑न्तः । अ॒न्धम् । दु॒रि॒तादि॑ति
 दुः - इ॒तात् । अरक्ष॑न् ॥ ररक्ष॑ । तान् । सु॒क्रत॑ इति॑ सु - कृतः॑ ।

वि॒श्व॒वे॒दा इति॑ वि॒श्व – वे॒दाः । दि॒प्सन्तः॑ । इत् । रि॒पवः॑ ।

न । ह । 32 (50)

TS 1.2.14.6

दे॒भुः ॥

त्वया॑ व॒यꣳ स॒ध॒न्य-स्त्वो॒ता-स्तव॑ प्र॒णी॒त्य॒श्याम॑ वा॒जान् ।

उ॒भा शꣳसा॑ सू॒दय॑ स॒त्यता॑ते ऽनु॒ष्टु॒या कृ॑णु॒ह्य॒हया॑ण ॥

अ॒या ते॑ अ॒ग्ने स॒मिधा॑ वि॒धेम॑ प्र॒ति स्तो॑मꣳ श॒स्य॑मा॒नं गृ॑भाय ।

द॒हाश॑सो॒ रक्ष॑सः पा॒ह्य॒स्मान् द्रु॑हो नि॒दो मि॒त्रम॑हो अ॒वघा॑त् ॥

र॒क्षो॒हणं॑ वा॒जिन॑-मा॒जिघ॑र्मि मि॒त्रं प्र॑थि॒ष्ठ-मु॑प॒ यामि॑ शर्म ।

शि॒शानो॑ अ॒ग्निः क्र॑तु॒भिः-स॒मिद्धः॑-स॒नो दि॒वा – [] 33

TS 1.2.14.6

दे॒भुः ॥ त्वया॑ । व॒यम् । स॒ध॒न्य इति॑ स॒ध – न्यः॑ । त्वो॒ताः । तव॑ ।

प्र॒णी॒तीति॑ प्र – नी॒ती । अ॒श्याम॑ । वा॒जान् ॥ उ॒भा । शꣳसा॑ । सू॒दय॑ ।

स॒त्यता॑त इति॑ स॒त्य – ता॑ते । अ॒नु॒ष्टु॒या । कृ॑णु॒हि । अ॒हया॑ण ॥ अ॒या ।

ते । अ॒ग्ने । स॒मिधे॑ति सं – इ॒धा । वि॒धेम॑ । प्र॒तीति॑ । स्तो॑मम् ।

श॒स्य॑मा॒नम् । गृ॒भाय॑ । द॒ह । अ॒शसः॑ । र॒क्षसः॑ । पा॒हि । अ॒स्मान् ।

द्रुहः । निदः । मित्रमह इति मित्र – महः । अवद्यात् ॥

रक्षोहणमिति रक्षः – हनम् । वाजिनम् । एति । जिघर्मि । मित्रम् ।

प्रथिष्ठम् । उपेति । यामि । शर्म ॥ शिशानः । अग्निः । क्रतुभिरिति

क्रतु – भिः । समिद्ध इति सं – इद्धः । सः । नः । दिवा । 33 (50)

TS 1.2.14.7

स रिषः पातुनक्तं ॥

वि ज्योतिषा बृहता भात्यग्निराविर्विश्वानि कृणुतेमहित्वा ।

प्रादेवीर्मायाः सहते दुरेवाः शिशीते शृङ्गे रक्षसे विनिक्षे ॥

उत स्वानासो दिवि षन्त्वग्ने स्तिग्मायुधा रक्षसे हन्तवा उ ।

मदे चिदस्य प्र रुजन्ति भामा न वरन्ते परिबाधो अदेवीः ॥ 34

TS 1.2.14.7

सः । रिषः । पातु । नक्तम् ॥ वीति । ज्योतिषा । बृहता । भाति ।

अग्निः । आविः । विश्वानि । कृणुते । महित्वेति महि – त्वा ॥ प्रेति ।

अदेवीः । मायाः । सहते । दुरेवा इति दुः – एवाः । शिशीते ।

शृङ्गे इति । रक्षसे । विनिक्ष इति वि – निक्षे ॥ उत । स्वानासः ।

दिवि । सन्तु । अग्नेः । तिग्मायुधा इति तिग्म – आयुधाः । रक्षसे ।

ह॒न्त॒वै॑ । उ॒ ॥ म॒दे॑ । चि॒त् । अ॒स्य॑ । प्रे॒ति॑ । रु॒ज॒न्ति॑ । भा॒माः॑ । न ।

व॒र॒न्ते॑ । प॒रि॒बा॒ध इति॑ प॒रि – बा॒धः॑ । अ॒दे॒वीः॑ ॥ 34 (41)

(अ॒घ॒श॒ः – स॒ ते – ज॒र॒ता – रु॒जा॒मि – ह – दि॒वै –

क॒च॒त्वा॒रि॒श्च॑) (A14)

=====

पद पाठे (वाक्य सहित) – प्रथमकाण्डे – द्वितीयः प्रश्नः

Prasna Korvai with starting Padams of 1 to 14 Anuvaakams :-

(आप॑ उ॒न्द॒न्त्वा-कू॒त्यै॑-दै॒वी-मि॒यन्ते॑-व॒स्व्यस्य॑-ॐ॒शु॒ना॒ते-
सो॒मन्त॑-उ॒दायु॑षा - प्र च्य॑वस्वा-ग्ने॑रातिथ्य-म॒ॐशु॒र॑श्च॒शुर्-
वि॒त्ताय॑नी मेऽसि॑ - यु॒ञ्चते॑ - कृ॒णु॒ष्व पा॒ज-श्चतु॑र्दश ।)

Korvai with starting Padams of 1, 11, 21 Series of Panchaatis :-

(आपो॑-व॒स्व्यसि॑ - या त॒वे-य॒ज्ञी-श्चतु॑स्त्रि॒ंशत् ।)

First and Last Padam of Second Prasnam :-

(आप॑ उ॒न्दन्-त्व॑दे॒वीः ।)

॥ हरिः॑ ओं ॥

॥ कृष्ण यजुर्वेदीय तैत्तिरीय संहिता पदपाठे प्रथमकाण्डे

द्वितीयः प्रश्नः समाप्तः ॥

Summary breakup of Padam - in Kaandam 1, Prasnam 2

Particulars		Example (in Pada PaaTam)	No. of Padams as per Pada PaaTam
सामान्य पदानि	Ord	इषे । त्वा । ऊर्जे ।	1335
उपसर्ग पदानि	PRE	एति = (आ+इति) । उपेति = (उप+इति) । प्रेति = (प्र+इति) ।	126
वेष्टन पदानि	PS	उपायवः = उपायव इत्युप - आयवः । बाहुभ्याम् = बाहुभ्यामिति बाहु - भ्याम्) ।	205
प्रग्रह पदानि	PG	ते = (ते इति) । त्वे = (त्वे इति) । चक्षुषी = (चक्षुषी इति) । विष्णो = विष्णो इति ।	17
प्रग्रह वेष्टन पदानि	PGS	अधिषवणे = अधिषवणे इत्यधि - सवने । इन्द्राग्नी = इन्द्राग्नी इतीन्द्र - अग्नी	7
Total Padams			1690

Details of Panchati and Padam for Kandam 1 – Prasanam 2 – TS 1.2

	Panchati	Padams
Anuvakam 1	2	108
Anuvakam 2	3	130
Anuvakam 3	3	175
Anuvakam 4	2	105
Anuvakam 5	2	79
Anuvakam 6	1	57
Anuvakam 7	1	72
Anuvakam 8	2	85
Anuvakam 9	1	73
Anuvakam 10	2	101
Anuvakam 11	2	90
Anuvakam 12	3	135
Anuvakam 13	3	139
Anuvakam 14	7	341
Total →	34	1690